

■ PCD DAL GRISCHUN

Fitg cuntenta cun ils resultats da las votaziuns

(cp) La Billag daventa pli faira, la medischna da preimplantaziun pli segira e l'attatga sin la suveranità chantunala vegn refusada. La Partida cristiandemocratica (pcd) grischuna è zunt satisfatga davart ils resultats da las votaziuns da dumengia passada. «Cun ils resultats da las davosas votaziuns avant las tschernas da quest atun stat la pcd puspè sin la vart dals victurs. Quel success duai sa cuntinuar era tar las elecziuns», constatescha il president da la pcd grischuna, cuss. dals chantuns *Stefan Engler*.

La pcd ha gudagnà

La pcd dal Grischun – ed a la frunt cuss. naz. *Martin Candinas* – han cumbattì per la revisiun da la lescha da radio e televi-

siun e beneventan perquai fitg il gea. Sco sulet chantun triling ed il pli grond da la Svizra tudestga ha il Grischun detg cun 50,85% gea a la revisiun ed uschia avert la porta ad ina acceptaziun da la revisiun en Svizra. «Sco quai ch'il Grischun dependa da vias, viafiers e spitals, basegna il chantun triling in'infurmaziun da basa tras radio, televisiun e gasettas», tenor cuss. dals chantuns *Stefan Engler*.

Era las chasadas privatas vegnan distgargiadas, las interpresas liberadas da la burocracia e la taxa pli faira. La pcd ha praticamain cumbattì persula en il Grischun per la revisiun. L'engaschi è sa pajà. Cun cuss. naz. *Martin Candinas* – sco copresident dal comité gea a la revisiun – è la pcd grischuna s'engaschada cun suc-

cess e gudagnà. «Il chantun Grischun dat cun ses gea a la revisiun da la lescha per radio e televisiun in cler signal a pro da la trilinguitad», segund cuss. naz. *Martin Candinas*.

Zunt leda è la pcd ch'il suveran ha refusà cleramain las duas iniziativas davart la taglia d'ierta e pertutgant ils stipendis. La taglia sin ierta avess fatg massivamain donn a las interpresas pitschnas e mesaunas e fiss stada in'attatga fruntala sin il model da success Svizra e la suveranità da taglia dals chantuns. Er è la pcd fitg cuntenta che l'iniziativa da taglia d'ierta ha fatg cleramain naufragi cun 76,02% da las vuschs en il Grischun. Gist uschè cler è l'iniziativa per stipendis vegnida sbittada cun 77,23%. Era questa iniziati-

va muntava in'attatga directa sin la suveranità chantunala.

Rinforzar sia politica da consens

Fitg satisfatga è la pcd chantunala grischuna che la proposta per la diagnostica da preimplantaziun è vegnida acceptada en il Grischun. Ella è dentant ferm da l'opiniun che l'acceptaziun na dat betg pass liber da pudair far tut quai ch'è medicinalmain pussaivel e na far stim da dumondas eticas davart la vita. I na dastga mai vegnir uschè lunsch che la decisiun sur da la vita, degna da vegnir vivida, u la selezziun d'embrions vegn prendida ordavant da scienziats e medis. Tant la scienza sco la medischna ston servir a la vita.

La pcd è stada tar las votaziuns a la fin da l'emna ina giada dapli tar ils victurs. La posiziun da la pcd grischuna ha la populaziun acceptà e purtà. Ella è persuadida che sia politica dal center per schliaziuns constructivas è da rinforzar en vista a las tschernas da quest atun. La Svizra dovra ina ferma pcd che preschenta schliaziuns burgaisas che chattan tant consens sco ina maiortad. Cun posiziuns extremas da dretg e sanester na vegn la Svizra betg vinavant. Perquai sto la politica da la pcd vegnir rinforzada quest atun tar las tschernas en il cussegl naziunal ed il cussegl dals stans. Ella è garanta per il model da success che sa numna Svizra.